

## Pilipai ali leta Paulo ana lelelele

*Walo bagubagunana*

Paulo ana takikili labuina koina ilau yanuwa Pilipai koina bwaimwa taon yabo Masidoniya polovinsi kalona mena. Paulo ana paisowa yo ana yakayakatai kolili tomo tupwana sikawayawasosi yo simeliyan kabo ekalesiya itubu Pilipai koina (Apositolo ali paisowa 16:11-40 koina wagitai). Ana takikili yaiyonana koina tabe tomeliwo Pilipai koina igitaiyoili (Apositolo ali paisowa 20:6). Kabo ilau Yelusalema yo muli mena ilau Loma ana yatala kaiwena. Bolime labui imiyamiya Loma nume pan mena. Mwa kana koleya besiele sauganane bwaine koina Paulo leta bwaite ilele yo iyawasa Pilipai tomeliwo kolili. Paulo leta bwaite ana lelena yaina nuwanuwana ikawatoki Pilipai tomeliwo kolili ali sanguina kaiwena (1:5, 4:10-19). Paulo nuwanuwana ikabiyakaiweyoili yo yakato tem sinuwalobi (2:1-11) yo mumugali besiele tomeli yawasosi mumugali. Toyakayakataiwo tupwaliyao siwalo yakato tem Pilipai tomeliwo Mosese ana loina simuliya kabo kani Yaubada ikawa-namwanamwa-yagili. Na Paulo iwalo kolili iba, nigele, tem Yeisu Keliso tameliyan kabo Yaubada ikawa-namwanamwa-yagila (3:1-11). Mwa Paulo ikabi-yakaiweli na sitolo kaikaiwe meli yawasosi koina.

<sup>1</sup> Yau Paulo mekaukava Timoti, kai Yeisu Keliso ana topaisowao panpanli, leta bwaite

kalele yo kayawasa Pilipai tomeliwo kolimi, mekamikavao ami tobagunao yo ami dikonyao. Komiu Yaubada ana tomoyao, kaiwenaele kwamiyako Yeisu koina.

<sup>2</sup> Kakawanoi Yaubada Tamala yo ala Guyau Yeisu Keliso ali katekamkamna, yo ali nuwandaumwali mena katemiyao siloya-kalapowonli.

*Paulo ana walo mulolo yo ana kawanoi  
Yaubada koina Pilipai kaiweli*

<sup>3</sup> Sauga meuloina tem yanuwatuimiu yakawatoki yagu Yaubada koina,

<sup>4</sup> yo tabe sauga meuloina yakawanoi komiu meuloi, kaiwemu meyagu yaliyaya yakawakawanoi.

<sup>5</sup> Yagu yaliyaya yaina kaiwena iyatubu sauganane kwanuwabui, komiu yo yau taesagusagu-wagila wasana namwanamwana paisowana tapaipaisowaili ilaoma kanasiga sauga kabona.

<sup>6</sup> Yo yakatai namwanamwai Yaubada iya tauna kona paisowa namwanamwana iyatubuya kolimi iya tabe kani ipaipaisowa kanasiga kalyatenane Yeisu Keliso ipileyoima.

<sup>7</sup> Ilonamwayan tem kagu lotonan kategu mena komiu meuloi, kaiwemu ilalakisosi kabu sauga meuloina yanuwatuimiu lalakina. Kaiwena tem yau ele nume pan mena o nuwana yagamwa-pakiki wasana namwanamwana kana yawasosi kaiwena komiu mwa kwasaguiyau paisowane koina, bwaite Yaubada iyeyama kolila. Mwa komiumo kami katekamkamna ilalakisosi kategu mena.

**8** Yaubada kategu ikatai nuwanuwacosig u tem yagitalimiu kaiwena yakatekamkamna-yagimiuk o besiele Yeisu Keliso ikatekamkamna-yagimiuko.

**9** Yakawakawano i kaiwemiu yo nuwanuwagu mulolo mumugana ilalalaki yawasimiu koina yo besiele tabe Yaubada kana katai ilalaki kolimiu yo ami nuwatu sidudulai,

**10** na mesabana mumuga meuloina wagitesip-wai yo toweya namwanamwana ele iya wakalai kwapaisowai besiele. Na iya koina nige kami kawa-naenae yo kami yakewa yabo ipapagan ilau kanasiga Yeisu ipileyoima.

**11** Tab e nuwanuwagu mumugana namwanamwana Yeisu Keliso koina ilaoma na yawasimiu iloyakalapowonli na ala Yaubada kwayakasisiyan na kwatobalan.

### *Paulo ana kabiyakaiwe Pilipai kolili*

**12** Yagu tali toekalesiyayo, nuwanuwagu wakatai yakato ali peiyau deli mena wasana namwanamwana kana debalala isagui. Bwagana me yagu kamkamna na iyamo tomo sibaibaiwa wasana namwanamwana sibenalanako.

**13** Mwa Sisa ana tokaleyayao siya ana nume wasawasana kana togitekalatanwo mekalikavao tomo meuloili dedei bwaite koina, sikataiyako Keliso kaiwena mwa sipei-luse-yagau nume pan mena.

**14** Yaboyoi yagu lusaene koina kalakavao sibaibaiwa ali meli Guyau koina ikaiwe molosi yo sikatepatu, nige simamatausi Yaubada ana walo kana luwewasa kaiwena.

**15** Na tomo tupwaliyao sitakitakikili wasana namwanamwana siguguyeyan me ali lamwapolowe koliyau yo sikawa-naenae-yagau, na iyamo tomo tupwaliyao Keliso wasana siguguyeyan me ali yaliyaya kaiwegu.

**16** Boda labuinane sikatai yagu lusae nume pan mena Yaubada italamwan na wasana namwanamwana yakawa-yawasosiyan, koinaele me ali katekamkamna Keliso siguguyeyan.

**17** Na siya bodane tolamwa-polowene koliyau nige nuwatu dudulaina mena siguguguye na Keliso wasana siluwewasa-yani kaiwena nuwanuwali sibomamo esali sikeleisinagili, yo ali nuwatu yakato sowasowali naenaena siginauli koliyau saugana yamiyamiya nume pan kalona meña.

**18** Na iyamo, koliyau nige tawae yabo, bwai yayaliyayamo. Bwagana tem ali nuwatu dudulaina o nuwana tem ali nuwatu wenowenona, na iyamo bwaimwana Keliso wasana siluweluwewasa-yani, bwaite ginauli lalakisosina, mwa koinaele yayaliyayamo.

**19** Kaiwena yakatai ami kawanoi maisana yo Yeisu Keliso yaluyaluwana ana kabiyakaiwe koliyau tawae iyawatagiliko koliyau kani Yaubada polowene ibuikeile yagu kaba yaliyaya temga yayawatagili nume pan mena o yanuwa yaulina yalogabaen.

**20** Bwagana tem yaboita o nuwana tem yanamwanamwa na nuwanuwwasosigu ele yagu paisowane koina tomo meuloili Keliso esanamo sikeleisin kaiwena mwa me yagu katepatu sauga meuloina, nige yabo yagu matausi yo nuwana

yagu mwalimwaline.

<sup>21</sup> Na yau, tem meyawasigu inamwanamwa kaiwena yamiyamiya Keliso koina. Na tem yaboita, kabu inamwanamwa molosi.

<sup>22</sup> Na tem nige yaboboita, sowasowana yapaisowa yo uwena iyawatagili. Mwa nige yakakatai toweya koina nuwanuwagu kani yalauya.

<sup>23</sup> Nuwatu labui sitabetapeiayu. Nuwanuwamolosigu ele tem yanuwa yaulina yalogabaen yo yalaau Yeisu mekaukava kamiya toyawa, iya yawsosi inamwanamwa molosi.

<sup>24</sup> Na komiu saguimi kaiwena mwa sowasowanamo yamiyamiya yanuwa yaulina mena.

<sup>25</sup> Yakatai namwanamwai yagu paisowa iyaele kani yaginauli komiu kaiwemiu, mwa yakatai naga yamiya yanuwa yaulina mena. Mekaukavao komiu naga tamiyamiya yo naga yasaguimi ami meli sikaiwe yo kwayaliyaya,

<sup>26</sup> na mesabana yagu sauga pileyoimayoi kolimiyo yo kwayaliyaya lalakina kaiwegu yo Yeisu Keliso kwatobalan.

### *Kwatolo kaikaiwe Keliso kaiwena*

<sup>27</sup> Ginauli yabo lalakina sauga meuloina tem mumugamiu sinamwanamwa kaiwena iya koina mwa Keliso wasana namwanamwana iyamayale. Mwa bwagana tem yalaowa yagitaimiu, o tem nuwana kagu mwayaga iyai yo wasamiumo yabenalan yakatai ami nuwatu kaigedamo kwatolo kaiwe, kwatolo kaiwe toyawa tomo kwayanuwabuili wasana namwanamwana koina.

**28** Yo kami tokalomagigiliwo nige sowana siulamatamasagimiu. Tem kwapaisowai besiele bwaine yo koina kami tokalomagigiliwo sikatalobai nige ali kaiwe ipapagan naga siya sisilae, yo sikatai komiu kwanamwanamwa kaiwena Yaubada isaguimiu.

**29** Kwatolo kaikaiwe kaiwena Yaubada italam kwapaisowa Keliso kaiwena nige yakato italamwan mowoi koina kwamelimo, na iyamo kamkamna kani kwalobai iya kaiwena.

**30** Tauna kona wagitaiyau yakaleya Pilipai koina na sauga bwaite iyaele tabe yakalekaleya nume pan mena yo yagu kaleya wasanane kwabenalanako. Kabo kaleyanganane kaigedana iyaele mwa komiu koina tabe wakalekaleyane.

### *Tanuwalobi besiele Keliso ana nuwalobi*

## 2

**1** Keliso ikabi-yakaiwemiu yo ana katekamkamna ikabi-yaliyaya-yagimiu, Yaluyaluwana iyaele wakalaiyako mekamikava, yo kamikavao wakate-kamkamna-yagili.

**2** Tem bwaine besiele kabu kani yakabi-yakaiwemiu tem ami nuwatu kaigeda, yaluyaluwamiu kaigeda yo kwaemulomulolowagimiu na mesabana ami paisowane koina yayaliyaya lalakina.

**3** Tabu yakato komiu ginauli yabo kwapaisowai kaiwena kwabomamo ami nuwatu mena na tem kaiwena wagagasa. Na sowasowana me ami nuwalobi kamikavao wakeleisinagili na komiu besi.

<sup>4</sup> Yo tabu yakato kwabomamo ami namwanamwa kaiweli kwaloyaloya na tabe kamikavao ali namwanamwa kwaloyaili.

<sup>5</sup> Sowasowana ami nuwatu besiele Yeisu Keliso ana nuwatu.

<sup>6</sup> Bwagana iya Yaubada mekanakava sitoyatoyawa na iyamo nige inunuwatui kaba miyane kaiwena.

<sup>7</sup> Mwa iya ibomamo ana kaba miya wasawasana ilogabaen, yo ilobima yanuwa yaulina mena iyamala tomo bwagabwaga mumugana besiele topaisowa yabo.

<sup>8</sup> Iyamala tomo besiele kita, yo me ana nuwalobi ibomamo ipei-yatalu, Yaubada ana walo iobigai yo ilau boita lolonna mena yo kanasiga itake kelose mena.

<sup>9</sup> Bwaine iya kaiwena Yaubada ikeleisinan kaba miya saesaesosina koina yo esane iya esa meuloili ilalaki-gabaegili mwa iwolena koina.

<sup>10</sup> Yo kabo siya tomiya bulibuli, yo tomiya yanuwa yaulina yo tabe siya simiyamiya tanoluwa mena tutulili sitalu-sakonayagili Yeisu esana kana yakasisi kaiwena,

<sup>11</sup> yo meuloili siba, “Yawasosi Yeisu Keliso iya Guyau.” Siwalo bwaine besiele yo Yaubada Tamala esana sikawa-wasawasa-yani.

### *Kwalala mayalemiu besiele utu mayaleli*

<sup>12</sup> Kateguwao komiu yagu elieliyamwao, tauna kona yaumekamikava yo kainagu meuloina kwaobigai na sauga kabona bwagana kagu mwayaga iyai kolimiu na iyamo iyaelemo kainagu kwaobiobigai. Kabo sowasowana me ami tabubu Yaubada kwamatausen na

mumugamiu sidudulai na mesabana lebo kwalobai.

<sup>13</sup> Kwapaisowai besiele kaiwena Yaubada iya ipaipaisowa katemu mena na tem kwabomamo kwatalamwagimi na ana nuwatu kwaobigaili.

<sup>14</sup> Temga ginauli yabo waginauli kisi kwaeta-lapili yo wagamwapakiki,

<sup>15</sup> na mesabana kwaemala tomo kapwakap-wali na tabu kami yakewa yabo naenaena kai-wena. Mumugamiu besiele na mesabana kwaemala Yaubada natunao namwanamwali bwagana kwamiyamiya siya yaso bwaite toyauyaule luwali mena. Wasana namwanamwana, bwaimwa yawasi yawasosi, sowasowana kwayawasa kolili yo kabu mayalemiu silala luwaluwali mena be-siele utu silala kewa mena.

<sup>16</sup> Tem waginauli besiele bwaine kabu kaliy-atenane Keliso ipileyoima kani me yagu gagasa kaiwemiu kaiwena yakatai yagu sauga yo yagu paisowa nige yayayavenuwan kolimiu.

<sup>17</sup> Mwa bwagana kwasinegu sisuwai besiele wain topwaoli sisuwai pwaoli pwatana mena yayaliyayamo yo mekaukavao komiu tayaliyaya-gogo kaiwemiu.\* Kaiwena bwaite sauga ami meli Yeisu koina kana koleya besiele pwaoli waginag-inauli Yaubada koina.

<sup>18</sup> Kabo ilonamwayan komiu yo yau tayaliyaya-gogo tawae iyaele iyawatagiline koliyau kaiwena.

### *Timotiyo Epapilodaito wasali*

---

\* **2:17:** Tem Yudiya yakayakan sipwaoliyan Yaubada koina tabe wain tupwana sisuwai yakayakan pwatana mena ali pwaoline kana etulan.

**19** Masa kikiunamo kani Timoti yayawasa ilalaowa kolimi, tem Guyau ana nuwatu besiele. Na tem saugana ipileyoima wasamiu yabenalan koina yo ikabi-yaliyaya-yagau.

**20** Iya nuwanuwagu ilaowa kaiwena yanuwanuwatu nige yabo besiele Timoti, iya iboma ana nuwatu besiele yau yagu nuwatune, inuwanuwatusosi saguimiu kaiwena.

**21** Kamakavao meuloili sinuwanuwatu sibomamo kaiweli na nige sinuwanuwatu Yeisu ana paisowa kaiwena.

**22** Na Timoti ana paisowa namwanamwana wasana kwabenalanako yo wakataiyako mekaukava kapaisowa-gogo wasana namwanamwana kaiwena kana koleya besiele game yabo me tamana.

**23** Nuwanuwagu yagu yatala yabenali-bagunayan na yakatai tawae kani iyawatagili koliyau, kabu Timoti yayawasayawa kolimi.

**24** Yo yameliyan Guyau yagu kamwasa isoke sauga kikiunamo kabu yaboma yalaowa na yagaloloimiu.

**25** Yanuwatui sowasowanamo kalakava Epapilodaito yayawasa-yavivilayawa kolimi, iya yagu tali topaisowa yo yagu tali tokaleya Keliso kaiwena, tabe iya ami tosagenawasa bwaimwana kwayawasayama koliyau na isaguiyau kagu eoma koina.

**26** Nuwanuwasosina tem meuloimiu igitaimiuyoi. Tabu me ana nuwa-polowe kaiwena ikatai tauna kona wasana kwabenalan ikasiebwa. Nige nuwanuwana kwanuwanuwatu ana kasiebwane kaiwena.

<sup>27</sup> Ikasiebwa yawasosi masa kikiunamo iboita, iyamo Yaubada ana katekamkamna koina mwa inamwanamwako. Yau tabe besiele Yaubada ikatekamkamna-yagau, kaiwena tem na iboita ana boitane nuwanaena yagu nuwanaene kani ietulanyoi.

<sup>28</sup> Mwa yagu nuwatu lalakina bwaite yakato yayawasa ipileyoowa kolimi na sauganane tem wagitai kwayaliyaya na tabu yagu nuwanae ilalalakisosi.

<sup>29</sup> Me ami yaliyaya Guyau esana mena kwayogan. Tomo bwaimwa besiele siya kwayakasisiyagli,

<sup>30</sup> kaiwena iya yawasina italamwan Guyau ana paisowa kaiwena masa kikiunamo iboita kaiwena sagune komiu nige sowamiu waginauli koliyau na iyamo iya sowsowana iginauli kaiwegu.

### 3

#### *Keliso kaiwena Paulo ginauli meuloili isikotanagili*

<sup>1</sup> Yagu tali toekalesiyayao, bwaite besiele kwayaliyaya kaiwena kwamiyako Guyau koina. Nige kana nae yabo koliyau saugana yaleleleleyoi kolimi ginauli tupwaliyao kaiweli besiele tauna kona yalelelele kolimi. Yapaipaisowa ami namwanamwa kaiwena.

<sup>2</sup> Wagite-kalatagimiu tomo tupwaliyao siya tosamalulu besiele bwauwa siya naenaena kana topaisowa yo siya siwalo yakato Yudiya mumugali simuliya tem nigwenigwe mumugana

takalai muli mena kabo taemala Yaubada ana tomoyao.

<sup>3</sup> Na iyamo kita Yaubada yaluyaluwana ana kaiwe mena tatapwalolo koina, kita tawae Yeisu Keliso ipaisowai kaiwela iyamo tayaliyayayan, yo nige taboma ala namwanamwa yo taboma ala paisowa mena ala meli tapepei. Mwa kitamo nigwenigwe mumugana yawasosi takalaiyako yo taemala Yaubada ana tomoyao.

<sup>4</sup> Tem nuwanuwagu sowasowagu yagu namwanamwa kwapigu koina yagagasa. Tem yabo inuwatui yakato ana yai ipagan na tem igagasa yau tabe yagu yai sibaibaiwa yo sowasowa-molosigu.

<sup>5</sup> Kaiwena sikabiyau kalyate eiti (8) simwawasi mwa nigwenigwe mumugana yakalai besiele Yudiya mumugali. Yau boda Isileli yabo yagu susu Beniyamina yo tubuguwao siya Ibeliu tomoliyao yawasosi. Yudiya ali loina yamuliya namwanamwai kaiwena yau tauna kona Palisi ali boda yabo.

<sup>6</sup> Yagu sauga Palisi koina yakepate lalakina mwa Yeisu kana tomeliwo yayakamkamnali. Yabatoko yakato Yaubada ana paisowa yapaipaisowai. Tem tomo mumugagu sigitesipwai Moses ana loina kana edeedede koina yaumo tosanapu.

<sup>7</sup> Tawae tauna kona yanuwanuwatuiline yabatoko yagu kaba namwanamwa na sauga bwaite yagite-lobai yagu kaba silae kaiwena mwa Keliso ana kamwasa yamulimuliya.

<sup>8</sup> Walo yawasosi Yeisu Keliso yakatai iya yagu Guyau yo yakatai iya ginauli lalakisosina mwa nuwatu meuloina yanuwanutuili siya kaba

boita. Kabo Keliso kaiwena ginauli meuloili yasikotanagili yo kali koleya koliyau besiele ginauli bwagabwaga koinaele Keliso yakalai,

<sup>9</sup> yo mekaukava kamiya toyawa. Yo sauga kabona nige yanunuwatui yakato tem Mosese ana loina yaobigaili kabo Yaubada ikawa-namwanamwa-yagau yagu paisowa namwanamwana kaiwena. Na sauga kabona Keliso yameliyan mwa Yaubada yagu meli kaiwena ikawa-namwanamwa-yagau.

<sup>10</sup> Nuwanuwagumo Keliso yakatai yo ana toloyoi ana kaiwe tem yalotonan yo besiele ana kamkamna tem koina yakamkamna yo kanasiga yaboita besiele iya ana boitane.

<sup>11</sup> Koinaele yau yagu meli besiele kani Yaubada ikeleyatoloyau boita mena.

### *Tasagenka kaiwe na maisa takalai*

<sup>12</sup> Nige yakato yau Keliso kana katai meu-loina yakatai-woli yo yau tomo namwanamwana, nigele. Na iyaelemo yakepakepate yo yasage-sagena temga maisane yakalai, bwaimwa kaiwena mwa Yeisu ikalaiyauko.

<sup>13</sup> Yagu tali toekalesiyayao, nige yanuwanuwatu yakato Yeisu Keliso mumugana meuloina yakalai. Iyamo ginauline tawae tauna kona yapaisowailiko nige kaiweli yanunuwatuto. Na iyamo yakepatemo tawae ginauli mangu mena ilalaoma kaiwena.

<sup>14</sup> Kabo yasagena dudulaimo yo yayawatagli kaba sagena lopei mena na maisa yakalai. Maisane iya Yeisu Keliso koina Yaubada iyganiyau yalau koina yo yamiyayai kani nige ilolotom.

**15** Sowasowana kita ala nuwatu simatuwa yo meuloila ala nuwatu besiele kabona tawae yawalowenako. Na tem ginauli yabo kaiwena ami nuwatu isagena-suwala kabo Yaubada iya ikabi-yamayale kolimi.

**16** Na ginauli yabo lalakina, mumugana namwanamwana tem takalaiyako iyamo tagitekalatan namwanamwai.

**17** Yagu tali toekalesiyayao, kagu lau mena kwalau yo ami kaba kelakulu ele yau.

**18** Kaiwena tomo sibaibaiwasosi mumugali iwalo-masalagili siya Keliso ana boita kelose mena wasana sikalomagigilan. Yo sauga meuloina ami wasa bwaite yaeyaeyawa meyagu valam, bwaite ami wasa yaeyawa yoi.

**19** Tawae ali nuwatu yoli mena isasaemane siginauli besiele, besiele yoline iya iyamala ali yaubada. Yo mwalimwaline mumugana ali kaba yaliyaya yo ali kaba gagasa yawasosi yo sinuwanuwatu diyalimo kaiwena yo yanuwa yaulina gogoliyao kaiweli. Ana kaba mwawasi Yaubada kabo iyakenayagili Giyena koina.

**20** Na kita ala yanuwa yawasosi ele bulibuli mena kabo me ala katepatu tasanasana Tolebola ilobimaya bulibuli mena iya Guyau Yeisu Keliso.

**21** Iya ana kaiwe mena ginauli meuloili ipeilobiyyegili yo iloinayagili kabo kaiwene bwaine koina kita yola belubeluli yo kamkamna-naeli ibuikeileli yo yola namwanamwasosili iyelima besiele iya yona.

## 4

**1** Yagu tali toekalesiyayao, komiu yamulolo

kolimiyo nuwanuwwasosigu tem yagitaimiu kaiwena komiu yagu kaba yaliyaya yo yagu paisowa uwena mwa yau kaba gagasa. Kabo kwatolo kaiwe Guyau koina bwaimwa yagu walo ele.

*Paulo ana kabiyyakaiwe mwawamwawasina*

<sup>2</sup> Yodiya yo Sinitiki, yomiu labuine yaguguyaimiu nuwamiu kaigeda, kaiwena komiu kwalaomako Guyau koina kwamiyamiya.

<sup>3</sup> Yo kabu Sisigusi\* kowa yagu tali topaisowa namwanamwana yakawanoi koliwo kulau bwaine sinesineone labuine kusaguili na mekamkavao sowasowana ali miyamiya kuyadudulai. Tauna kona yoli labuine siya mekaukavao kakepate kaiwe wasana namwanamwana kana paisowa koina, yo mekamakavao Kelementi yo kagu tosagu meuloili siya esali Yaubada ileleyako yawasi bukina mena.

<sup>4</sup> Sauga meuloina kwayaliyaya kaiwena kwalaomako kwamiya Guyau koina. Yo yawaloyoi yaba kwayaliyaya.

<sup>5</sup> Mumugamiyao sibiga kamikavao meuloili koli kaiwena sauga kikiunamo kani Guyau ipileyoima.

<sup>6</sup> Tabu wakakate-wakaka ginauli tupwaliyao kaiweli tem ginauli esana kwaemayan, ami kawanoi mena kwawalo-masalan Yaubada koina me ami kawatoki.

<sup>7</sup> Kabo Yaubada ana nuwadaumwali, tomo ana sonoga nige sowana ilalaki-gabaen, katemu yo

---

\* **4:3:** Tomone bwaite Sisigusi esana Paulo nige ilelele na iwalomo kowa yagu tali topaisowa namwanamwana na esanane iwalo maimaiyani.

ami nuwatu igana-takikilan kaiwena kwamiya  
Yeisu Keliso koina.

<sup>8</sup> Yagu tali toekalesiyayao, yagu walo yaetu-lanyoi. Ginauli namwanamwasosili yo ginauli me kali tobali yo kali nuwatu katemiu siloyapowoni yo siya yawasosi yo sidudulai yo kapwakapwali, yo siya tayakasisi-yagili, yo tamulolo lalakina kolili.

<sup>9</sup> Tawae yayakenayagimi wakatailikoyo tawae yawalowen kwabenalanako yo wagitaiyako yapaisowailiko, ee mumugane bwaimwana kwateronagili na kwapaisowaili na mesabana nuwadaumwali kana Yaubadamekamikava.

*Paulo ikawatoki Pilipai ali mulolo kaiwena*

<sup>10</sup> Yayaliyaya lalakisina Guyau koina kaiwena ami nuwatuwa kwanuwatu-isinyoi yo kagu sagu kwayawasayama. Yakatai sauga meuloina kwanuwatu-kalatagau, yo tauna kona nige kamwasa dudulaina ipapagan yo koinaele nige kagu sagu kwayawasayama.

<sup>11</sup> Nige yakato yagu miya bubutumane bwaite koina na walone bwaite yawalowen, nigele, na mumugagu tem ginauli yalobai bwai yayaliyayamo.

<sup>12</sup> Bwagana tem yagogo o nuwana yabubutuma, o nuwana yamasuli o yaeoma nige sowana yamwasali bwai yayaliyayamo kaiwena ginauliliyaone miyamiyaliao kolili yamanasamko.

<sup>13</sup> Kaiwena Keliso ikabi-yakaiweyagau kaboa na kaiwe mena ginauli meuloina kolili sowasowagu.

**14** Yakawatoki lalakina kolimi kaiwena kagu polowe wakabi-yamalamalae.

**15** Wakataiyako nige boda ekalesiya yabo kolili kagu sagu nuwana mane o ginauli yabo yalolobai kolili, bwaimwanamo komiu Pilipai mwa yawasosi kwasaguiyau saugana wasana namwanamwana yaguguyeyan kolimi. Muli mena Masidoniya polovinsi yalogabaen.

**16** Tabe saugana yau ele Tesalonaika koina komiu mwa kagu sagu kwayawasayama yo tabe kwayawasayoiyama sauganane yagu sauga eoma koina.

**17** Tabu kwanunuwatui yakato ami mulolo yaloyaloyai. Na iyamo yaloyaloyaine bwaimwana mumugamiune namwanamwanane ilalaki mesabana Yaubada iwalo-muloloimiu.

**18** Ginauli meuloina yalobaiyako yakalapowon yo meuloina idudulai koliyau kaiwena ginauline kwayawasayama Epapilodaito koina yakalailiko. Siya besiele pwaoli bwalaina namwanamwana kwaolena Yaubada koina, yo iyaliyaya pwaoline siya bwaine besiele ikalaili.

**19** Yagu Yaubada gogo wasawasa namwanamwali ipowon koina mwa tem tawae kani kwaloyai, iyamo kani iyauya kolimi, kaiwena kwamiyamiya Yeisu Keliso koina.

**20** Ala Yaubada yo Tamala takawa-wasawasa-yani sauga meuloina kani nige ilolotom. O besiele.

### *Paulo ana kawa-kaiyonī*

**21** Yamulolo Yaubada ana tomoyao kaigeda kaigeda kolili, siya simiyamiya Yeisu Keliso koina. Kabo kalakavao simiyamiyamekaukavao simulolo kolimi tabe.

<sup>22</sup> Tomeliwo meuloili bwaite Loma koina simulolo kolimiu, yo tabe tomeliwo siya sipaipaisowa kin Sisa ana nume mena simulolo lalakina kolimiu.

<sup>23</sup> Ala Guyau Yeisu Keliso ana katekamkamna imiyayai kolimiu.

**Buki Tabu Waluwaluna  
The New Testament in the Tubetube language, also  
known as the Bwanabwana language, of Papua New  
Guinea**

**Nupela Testamen long tokples Tubetube long Niugini**

copyright © 2003 Wycliffe Bible Translators, Inc.

Language: Tubetube (Bwanabwana) (Bwanabwana)

Dialect: Tubetube

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

---

PDF generated using Haiola and XeLaTeX on 18 Apr 2025 from source files  
dated 31 Aug 2023

0931f701-f3ab-55d7-a908-17edd28ccc5a